



*Sabtu, 19 Desember 2020*  
**Ogen: I Korinti 10:13**



"Dibata Setia"



Lit sada poster kitik si itempel bas angkot nina, "Tidak ada manusia yang setia, hanyalah Tuhan yang paling mampu untuk setia." Rumah tangga si nggo erpuluhen tahun pe banci denga sirang, karyawan si nggo ndekah erdahin bas sada ingan pe, banci ia pindah, biang pe si terkenal setia man tuanna pe labo kerina setia. I bas 1 Korinti enda ituriken kerna kesetian Dibata nandangi perpulungen Korinti si ngenanami erbage-bage persoalen geluh. Persoalen enda terjadi perban perpulungen i Korinti erlumba ndarami kesenangan doni enda. E maka, tersinget Dibata arah Rasul Paulus gelah perpulungen e tetap min ernalem man Dibata, megenggeng, setia man Dibata amin gia melala persoalen geluh. I bas buena persoalan, megati kita kesetianta pe urak man Dibata, sidarami dalam pintas. Tempa Dibata la ergegeh nampati kita. Amin gia bage Dibata tetap setia man banta, la kita itadingkenna tupung lit perbeben mberat si man alanken, amin si tundalken ia, tetap kita itimaiNa mulih man baNa. Perlu lalap si inget maka Dibata setia i bas padanNa. La ipediatNa kita ngenanami percuban si ngelebihi gegehta, janah rikut i bas KesetiaanNa e iberekenNa ka man banta serpang pulah. Salah sada lirik lagu rohani sijudulna Pelangi Sehabis Hujan (Nikita) bas refrein'na nina **"Seperti pelangi sehabis hujan, itulah janji setiaMu Tuhan, di balik dukaku telah menanti harta yang tak ternilai dan abadi."** Pelangi me sada bukti Dibata setia i bas padanNa nikapken si mehuli man anak-anakNa. Dibata setia man banta, i bas kerina situasita; paksa kita kote, susah, paksa kita erdosa pe i je nge Dibata. Ia tetap ngaloken kita, ras ngkelini kita. Mari siukuri i bas ndalani Minggu Adven enda kerna kesetianta man BaNa! Adi bage me kesetian Dibata, selaku anak-anakNa tentuna kita pe erlajar setia man Bana. Kesetianta man Dibata, mabai kita nggeluh ndeher ras Ia, ras nggeluh bagi si ngena AteNa.